

# तिमोथीलाई

## पावलए उस०कताव परींद ओयो चिथी

तिमोथी एसिया खन्दलाव तोबो मिं ज़। ओआमा उयुं हुबो यहूदिनी, ओबाबु ते उयुं माहुबो उलिज़्याव (ओसाचीर १६:१-३)। तिमोथी परमेस्वरए ओयेनत पावलस ज़ा बाबु मिताव ज़ निलिज़्याव (१ तिमोथी १:२)। तिमोथीए एफिसस सहरलाव मन्दलीलाई ओसमारिज़्याव। नो पोल धुतनी पैज़्यावर, अडग्या पुजा दोज़्यावर सोनो पातज्या पातर्नी जैसिज़्यावर बनै ज़ यालिज़्याव (१:३-११; ४:१-८; ६:३-५)। है जैद आव चिथील पावलए तिमोथीलाई मन्दलील निताव ताताक लिद नो पाँर वैव उपरीव सतैसिउ लिज़्या (१:३)। मन्दलीलाव लोम्बार सोनो नलाव येनत सघैज़्याव सेरर 'इताव ताव परिके' लिन्या ब सरै:सिउ लिज़्या (३:१-१३)।

१ डा पावल गेलाई बाँचैज़्याव परमेस्वर सोनो आस दाद गेनैज़्याव येसु ख्रीसनी है निदाँवनी ज़ येसु ख्रीसए ओसाची खतैसिउ डालिज़्या। २ आव डासरो चिथी नँ तिमोथीलाई परींद डाईज़्या। परमेस्वरए ओपाँत गिन साचो ज़ा बाबु मिताव गिन्लिज़्या। नल्योदा गेबाबु परमेस्वर सोनो गेप्रभु येसु ख्रीसनी

नियुं ओय़ाल्क, नियुं ओगराँक, नँ नयुं ब होलाँ जैद उईनिक।

परमेस्वरए ओपाँ धुतनी पैज़्यावर

३ माकेदोनियादा डाबारिज़्याकाव है डादींज़्याव मिताव नँ एफिससल ज़ लिद परमेस्वरए ओपाँ धुतनी पैज़्यावरालाई, 'निताव मा:क' है दाद वैव ताके। ४ नोराए ओअर्थ

माल्यो घर्ती बिन्तीर भाःद अनाकल ज़ खरडाव मरडावराए मिनर यारा-पैज़्यार। ननी माथंरिउ ओर्घांताव पाँर वाज़ पुलुस्ज़्या। परमेस्वरए उयुंलाव मिताव ते युं हुण्ण्यानी वाज़ ताज़्या। ५डा है ल्यो डापैँज़्याव ते, या याल साचो युंस ओखैरक, सोनो परमेस्वरए ओपाँत यायुं हुण्द छैव युंस ज़ उलिरक। ६खाली र्खा मिँर ते आव चाव पाँलाई माथंरैधुद अनाकलाव पाँ जील ज़ डोइद लेर। ७नोराए, 'परमेस्वरए ओकानुनलाव यागुर्बार गे ज़,' है लिज़्यार। खाली 'आव ज़' है यारादोदी ब यापाँव पाँ याज़ माबुभिधुर।

८गे ज़ गेसैँज़्या, चावस चलैकिन परमेस्वरए ओकानुन चाव ज़ लिज़्या। ९परमेस्वरए ओकानुन परमेस्वरस खैव मिँए जूनी माःक। नो कानुन ते कानुन तैःज़्यावर सोनो माभैःज़्यावर, परमेस्वरए ओपाँलाई सोज़्याव पापीर, चाव पाँत लंन्द परमेस्वर माले है लिज़्यावर, याबाबु याआमार सैःज़्यावर, मिँ सैःज़्यावर, १०पातज्या पातर्नी जैसिज़्यावर, खेपा-खेपाल पातज्या जैसिज़्यावर, मिँर योःज़्यावर, धुत पाँज़्यावर, धुत गोहाई याज़्यावर सोनो परमेस्वरए साचो थंरिउ ओपाँकिन तँदा बाज़्यावराए जूनी जैसिउ लिज़्या। ११नो थंरिउ पाँ

उयुं ग़ाल्ज़्याव माहान परमेस्वरए डालाई सथैव उपरींनाव चाव था मिताव ज़ लिज़्या।

### पावलए ल्योदा परमेस्वरए उयुं ओगराँव

१२डालाई सघैँज़्याव गेप्रभु येसु खीसलाई बनै धन्याबाद लिज़्या। ओल ज़ डालाई उयुं हुबो थंरैद ओयेनत खतैनाक्यो। १३डा डादा-किन उमिन बले-दद्याद उमिनत बाज़्यावराए याखिरी पसिद बनै हाप हाप डाख्याज़्याव। खाली आव भरी ओललाई मासरेस्द मासैँद डादोवए उयुं नाद डालाई रास्नाक्यो। १४डाल्योदा उयुं ग़ाल्द डाक्याँताव ओयाँव असिक भन धोल पोगोल ताके। हिताव ज़ येसु खीसनी डादैव युं हुण्ण्या सोनो ओमया ओल ज़ डालाई याँक्यो। १५आव पाँ बनै थंरिउ युं हुण्ण्याकाव पाँ ज़ लिज़्या — येसु खीसए आव मानुवा-ताव पापीरालाई बाँचैन्याए जूनी हुके। नो भरिरानी प्राइँरानी पापी डा ज़। १६हितावत ब येसु खीसए पापी-रालाई कुधु ओरासहिज़्याव प्राइँलाई सतैँदचान्याए जूनी डा पापीराकिन ब पापीलाई परमेस्वरए उयुं गर्राँके। हिताव ज़ छीनीकाव ओललाई यायुं हुण्ण्यावराए अजम्बरी जुनी दैन्याए

जूनी डा डाक्यांताव ओदोव दया याडाक सतैसिउ मिताव लिङ्या। १७ है जैद छींङ पै रहिङ्याव सुए ज़ यामारं:धुङ्याव खर्क ज़ मासिङ्याव गेराजा, तोबोका तोबो परमेस्वरलाई ओमान ब ओताक, ज़गैवलाव उमिन ब छींङ पै उरहिक। आमेन।

### तिमोथीलाई पावलए ओयो हुकुम

१८ परमेस्वरनिकाव डाजा तिमोथी, डादा नजूनी परमेस्वरए उपुरूसनी यापाँव पाँलाई याका दाद परमेस्वरए ओयेनत नँ सिपाई मिताव जैसिद नो पाँदा ध्यावना दाव ताके। १९ स्त्रीसताव नयुँ नसुहुबोलाई जात ज़ मारास्द छैँव युँस दाव ज़ नैयो। ख्वाराए ते छैँव युँस दान्या यामाभै:वए यायुँ यासुहुबोलाई ब भन ज़ नोकसान जैकेर। २० हुमेनियस सोनो अलेक्जेन्दरनी ब निताव ज़ ताकिनी। है जैद स्त्रीसए उमिन बले:न्या ओमाताङ्याव ओल्यो लिन्या घदासिनिक लिद नोनिलाई सैतानए उकुइत ज़ भा:द डानिनै।

### मन्दलीए पोखारिन्या पाँर

२ डा प्राइरानी डात जेलाई बिन्ती दाद है डादाचिङ्या — प्राइँ मिँराए जूनी पोखारिच्यो, परमेस्वरए ओअसिक ब निद याराएच्यो। नोराए जूनी धन्याबाद ब चरै:च्यो। ३ सोनो गे

परमेस्वरए उमिनतावराए युँ होलाँ जैद रान छानस 'गेजिउ भरी परमेस्वरए उमिनलाई सघ्यो:द ओमान नैदचाव गेदैक' लिद राजार सोनो घेप्पा हक दैवराए जूनी ब पोखारिउ ताके। ३ नितावरालाई पोखारिदचान्या गेलाई बाँचैङ्याव परमेस्वरए उयुँलाव मिताव येन ब लिङ्या। ४ होए, प्राइँए ज़ साचो पाँलाई सरेस्द अजम्बरी जुनी ओदैरक लिन्या युँ दोङ्याव। ५ परमेस्वर तोबोका तोबो वाज़ लिङ्या। गे मिँरालाई परमेस्वरस सखैन्या गेत्याला ब तोबो वाज़ लिङ्या — हो मिँ मिन्सिद हुव येसु स्त्रीस ज़। ६ होए प्राइँए यापापए सजा फो:दचान्याए जूनी उजिउ ब भा:द याएक्यो। ननी ज़ परमेस्वरए ओगोइँव बेलाक ओसाची सरै:दचासिक्यो। ७ डा परमेस्वरए साचो ओपाँत ओकत्वाल्या जैसिद छुत जातलाव मिँरालाई नो पाँत सिऊद यायुँ सुहुपुदचान्या ओसाची खतैसिउ डालिङ्या। आव डापाँ ससैसिउ मा:क, ओअर्थ ज़ लिङ्या।

८ फरी ब है डालिङ्या, प्राइँ पोडाव यायुँ हुबो खेपाराए छैँव युँस ओपोखारिरक। या याल यायुँल माखैव तानैरक। ९ परमेस्वरए ओपाँत बाङ्याव मेंमाराए थिककाव पैरन ओदोरक। बनै ओए: ल्यो गहनार जासिद ओए: ल्यो क्वार क्वाइसिद

सोनो याचेमर छन्दनी भाँती जैद तासिडारैसिरक। १० बुरू चाव येननी ज़ परमेस्वरए ओमान नैदचाज़्याव मेंमारालाई यासहिज़्याव। ११ मेंमार याथकानस लिद भयाउँ भयाउँ मालिद ओपैसिरक। १२ डा मेंमारालाई खेपाराए डैत हक चलैन्त्या सोनो पैन्त्या डामाराजैए। बुरू नोर चिम दाद उलिरक।† १३ काराव ल्यो ताकिन परमेस्वरए डात आदमलाई जैक्यो, नकिन हब्बालाई जैक्यो। १४ भुकिउ आदम माःक, भुकिद पापल परिउ हब्बा ची। १५ हैदी ब मेंमार परमेस्वरलाई यायुं हुपुद ओमयाल छैवस लिद परमेस्वरए उयुंलाव मिताव येनर यादोकिन ज़ा यादैक परमेस्वरए नोरालाई जोगोइन्त्या ले।†

### मन्दलीलाव लोम्बार

३ आव साचो पाँ लिज़्या, जो मिँ मन्दलीलाव लोम्बा जैसिउ पैज़्याव, होए चाव येन ज़ खिम्ज़्याव। २ खाली नो मिँ प्राइँत ज़ ओखत माल्यो ताव परिके। नोए ओज्या ब तोबो वाज़ ओताक, सोनो प्राइँल थोरिउ, ओतहस ओमानस ल्यो, पाहुनार

समारिन्त्या, परमेस्वरए ओपाँ पैन्त्या ओगहक ल्यो ओताक। ३ फरी नो मिँ मद छोकोरा ओन्त्यात माड़मो, पैसाए लोभदा ब माबाव, इसिन्त्या रसिन्त्या ओयाःनी मापलेद ओमानस ल्यो ओताक। ४ उफिम चावस चलैधुन्त्या, ओज़ारालाई ब चावस ज़ दर्ईद मुइलिउर जैधुन्त्या ओताक। ५ जोए उफिमलावरालाई चावस माराचलैधुव होए परमेस्वरए ओमन्दलीलाई फन कै जैद ओचलैधुरिज़्याव? ६ सोनो नो लोम्बा जैसिज़्याव मिँ भर्जा परमेस्वरए ओपाँत हुव ताताक, मानी कैताराक सन्द सैतान उपरिउल ओल मनी परिन्त्या ओछ्यास लिज़्या। ७ फरी परमेस्वरए ओपाँत माहुव मिँराए याड़ाक ब चाव उमिन ल्यो ओताक, मानी नोराए नोए ओपाँःच्यार हाइद याएक सैतानए ओजालल परिन्त्या ले।

### मन्दलीलाव येनत सघैज़्याव सेर

८ हिताव ज़ मन्दलीलाव येनत सघैज़्याव सेरर ब यामानस ल्योर, यापाँ नेपाँ माल्योर, मद छोकोरा ओन्त्यात माड़मोर, पैसाए लोभदा माबाज़्यावर ओतारक। ९ बुरू यादैव

†२:१२ रूवा रूवा बिद्वानराए याबिचारनी हो बेलाकाव मेंमार मापरिउर याल्योए पावलए नितावनी ओपाँव। †२:१५ छुत बुफिन्त्या — बाँचैन्त्या ले।

२:१३ उत २:७,२१-२२ २:१४ उत ३:१-६

युं हुबो फैसिउ पाँलाई चावस तीद नत ज़ छैव युँस धिद उलिरक। १० नोरालाई डादा जाँचिद याखत माल्योर याथंरिकिन वाज़ मन्दलीलाव सेवात सघैन्या येन ओदोरक। ११ सेवात सघैन्या मेंमार<sup>१</sup> ब यासुबास ल्योर, अर्काए उछीनी मापाँन्यार, यातहस ल्योर, प्राइँत सतस ल्योर ओतारक। १२ सेवात सघैन्या खेपार फरी याज्या तोबो वाज़ ओताक। याज़ार सोनो याफ़िमलावरालाई ब चावस ओराचलैरक। १३ निताव सेवात सघैन्या येन दाज्यावराए यामिन स्यासो चाव येन यादोकिन नोराए यामान ब रहिन्या ले, येसु ख्रीसए ओपाँत ब यायुँर भन ज़ हुप्या ले।

### परमेस्वरए कप्सिउ ओपाँ

१४-१५ डा नल्योदा चाँदो ज़ हुन्या युं डादोज्या। खाली 'कैताराक धिलो ताए सै' लिद आव चिथी डादा ज़ सर्द डापरींज्या। आव चिथीनी ज़, 'गे परमेस्वरए उफ़िमलावराए इतावनी दोव ताके' लिन्या प्राइँए ज़ सैन्या जेले। परमेस्वरए उफ़िमलावर जींदो परमेस्वरए ओमन्दली ज़, साचो ओपाँलाई थरैदचाज्याव गज तर्ताव खाँबा ज़। १६ साचो ज़ आव

गेमानिज्याव परमेस्वरए कप्सिउ ओपाँ ते बनै अचम्बलाव लिज्या, परमेस्वर मिँए क्याँ जैसिद सरैःसिके।  
छैव पुरूसनी साचो ज़ थंरिके। ओचाकज्याराए याडाक ब सरैःसिके।  
उमिन प्राइँ जातलावराए याखाल् थास्के।  
संसारलाव काना कुनीड ब यायुँ हुपके।  
छीनी स्वर्गताव ओज़गैदा ज़ छींसिके।

### धुत पाँर पैन्या लेर

४ परमेस्वरए उपुरूसए छर्लङ्ग ज़ है लिज्या, छीनीकाव हुन्या बेलाक रूवा मिँराए परमेस्वरए ओपाँ रास्द सैतान सोनो भुकैज्याव पुरूसराए यारापैज्याव पाँदा ज़ बान्या लेर। २ निताव पाँर पाजीराए याछलनी ज़ रा·सिन्या ले। नोराए, 'धुतनी गेरापैज्या' लिन्या सैज्यावत ब यायुँ राव भँए दामिसिउ मिताव लातासो तान्या ले। ३ नोराए, 'बिह्या ब दान्या माताए, रूवा रूवा ज्यावर ब ज्यान्या माताए' है लिद यारापैरिज्यार। जे ते जेसैज्या, नो भरी परमेस्वरए गे साचो

<sup>१</sup>३:११ छुत बुफ़िन्या — मन्दलीलाव येनत सघैज्याव सेरराए याज्यार।

ओपाँर सैंद गेयुँ हुबोरालाई खुसीस ज़्यान्या जैद नैदचासिउ। ४परमेस्वरए ओजैव भरी चाव ज़ लिज़्या। जो ज़्याव ब, 'आव परमेस्वरनी हुव ज़' लिद धन्याबाद चरैःद खुसीस गेज़्युकिन माज़्यान्या काता ज़ माले। ५परमेस्वरए ओपाँत युँ हुपद पोंखारिकिन प्राइँ चोखो ज़ ताज़्या।

### धुत पाँलाई वैद साचो पाँ सथैन्या

६आव पाँ भरी परमेस्वरए ओपाँत हुवरालाई चावस नरासम्जैकिन येसु ख्रीसए चाव ओनोकोर थ०रिन्या नले, स़ोनो ड़ादाकिन ज़ नदोहुज़्याव नयुँ हुबो साचो परमेस्वरए ओपाँनी नबुद्धी ब भन ज़ छिप्नान्या ले। ७नलाव मिँराए याभाःज़्याव उर्ती माल्यो घर्ती बिन्तीर ताथैयो। बुरू नँ परमेस्वरए उयुँलाव मिताव छैँव युँ जैन्यादा उहिल हाइके। ८क्याँए जूँनी उहिल हाइज़्याव देखा युँल परमेस्वरए उयुँलाव मितावदा उहिल हाइन्या बनै ओचाहित ल्यो लिज़्या। नोए ओफाइदा आव जुनील ब ताज़्या, अजम्बरी जुनील ब ताज़्या। ९आव पाँ थ०रिउ, युँ हुपन्याकाव पाँ ज़ लिज़्या। १०नो फाइदाए जूँनी ज़ परमेस्वरए ओयेनत कलँ लिद धामा गेदोज़्या, काराव ल्यो ताकिन गेआस जींदो परमेस्वरए ल्योदा ज़ लिज़्या।

नोए ज़ प्राइँ मिँरालाई, खास ते यायुँ हुबोरालाई याबाँचैज़्याव।

११है जैद नँ आव पाँरानी ज़ पैद याअरैयो। १२नरापैक सुवाराए, 'इताव भर्जाकावए ओपाँ काता थैन्या' लिद हेला रँःन्या स्यासो तातानी। बुरू नँ नपाँ, नचाल चलन, नमया स़ोनो नयुँ हुपद छैँव युँस नदोज़्यावनी यायुँ हुबो प्राइँराए उसिऊसिरक। १३डा डामाहुवा पै मन्दलीलावरालाई धर्म-सास्त्र परिदद्याद यायुँ सभ्केःदद्याद यापैयो। १४ड़ादा मन्दलीलाव स़ेरराए नक्याँत याकुइ नैद परमेस्वरए उपुरूसनी यापाँज़्याक नदैव बरदान-लाई मारास्द दाव येन ज़ दोयो। १५आव प्राइँ पाँत नयुँ थू जैद दाव ज़ नैयो। हो ताकिन ची नँ खा ड़ादा नबाज़्याव नक्याँत भन ज़ रँःन्या ले। १६नक्याँए जूँनी स़ोनो नरापैज़्याव पाँलाई ब जाँचिद जोगोइसिद दोयो। इतावदा धामा नदोकिन अजम्बरी जुनील नँ ब नतारिज़्या, नपाँ थैज़्यावर मनी नल ज़ तारिज़्यार।

### ओगलती ल्योलाई सम्जैन्या

५ नँकिन स़ेरए ओगलती उलिकिन नोलाई खोरोनी है दान्या माःक, बुरू क्याँए बाबु स्यासो जैद सम्जैव ताके। नँकिन नधूँदाडाव ताकिन क्याँए भाइ स्यासो जैद सम्जैव ताके।

२हो मित्ताव ज़ मेंमारालाई मनी तर्दाडाव ताकिन आमा स्यासो, धूँदाडाव ताकिन बैनी स्यासो जैद छैव युँस सम्जैव ताके।

### राँदी मेंमारालाई समारिन्या

३चिऊन्या मिँ माल्यो राँदी मेंमारालाई चावस समारिद यारा-चिऊच्यो। ४फरी नो राँदी मेंमाए ओज़ार ओनातीर यालिकिन नोराए ज़ समारिद पाथस ओनैरक। डादा याक्याँदाडावराए ल्योदा धर्मलाव येन दान्या ओपैसिरक। ननी ज़ याबाबु याआमाराए याभार क्याल्सिद परमेस्वरए उयुँलाव मित्ताव ब ताज़्या। ५चिऊन्या मिँ माल्यो राँदी मेंमाए परमेस्वरए ल्योदा उयुँ थू जैद लाकनी रील पोखारिज़्याव। ६नो फरी, ओमन लागिउ माचाहिउ जीदा दुलिरिज़्याव उलिकिन नो मासिद ज़ सिउ स्यासो ताके। ७है जैद नोर मनी याखत माल्यो छैवर घतारक लिद नँ आव तोबो नेब्लो पाँ ब यासथैयो। ८खाली जोए ओक्याँदाडावरालाई ब मारासमारिउ, होकिन भन उफिमलावरालाई ओमारासमारिकिन, नो मिँ परमेस्वरए

ओपाँ रासोल गनिसिज़्या। परमेस्वरए ओपाँत खर्क ज़ माहुव मिँकिन ब माचाव ताज़्या। ९सोनो जे परमेस्वरए उमिनत दुप्सिज़्याव राँदी मेंमारालाई जेरासघैक साथी बर्सकिन यादाडावए उमिन वाज़ सर्द नैच्यो। नो मेंमा ओरेए ओसतत ल्यो,† १०चाव येनत उमिन थासो, ओज़ारालाई उघुरिउर जैव, उफिमक हुज़्यावरालाई चावस नैज़्याव, परमेस्वरए छैव उमीराए यासेवा दाव, दुखल लिज़्यावरालाई सुन्द समारिज़्याव, जो येनत ब चाव येन दाज़्याव ओताक।

११धामें राँदी मेंमाराए यामिन ते तासचर्यो। नोर कसाराक ख्रीसए ओसेवा दान्या याका मादाद रे दान्यादा वाज़ यायुँ थू याजैकिन, १२याभाःव किज्याल बुदिद नोर याखत ल्योर थोरिन्या ओछ्यास लिज़्या।† १३ख्वा ख्वार फरी येन मादाद फिम फिमक दुलिद माचाहिउ पाँर आदा होदा जैद माथैन्या पाँर थैद वै वै जैन्या ब लेर। १४हो देखा बुरू धामें राँदी मेंमाराए रेर दाद ज़ार दैद फिमकाव येन ओदोरक। हो ताकिन गेसुतुरराए गेमिन बले-दचान्या येम

†५:६ छुत बुफिन्या — नो मेंमाए ओरे तोबो वाज़ ताव। †५:११-१२ ख्वा ख्वा बिद्वानराए याबिचारनी हो बेलाकाव ख्वा ख्वा मेंमार राँदी याताक 'अबकिन रे मादाद ख्रीसए ओसेवा वाज़ गेदोया' लिद किज्या याभाःज़्याव।

दैन्या मालेर। १५हितावत ब रूवा रूवा राँदी मेंमार ते सैतानए ल्योदा धल्किधुकेर। १६है जैद रूवा यायुँ हुबो मेंमारास राँदी मेंमार यालिकिन होराए ज़ ओराचिऊरक, मन्दलीलाई घचैन्या माःक। मन्दलीए बुरू याक्याँदाडाव सु ज़ माल्यो राँदी मेंमारालाई माथैव मायो-वल ओराचिऊरक।

### लोम्बारालाई यामान नैदचान्या

१७मन्दलीलाई चावनी चलैज्याव परमेस्वरए ओपाँ बनै धामास पैज्याव लोम्बारालाई सघैन्या सोनो मान दैन्याकावर ज़ गनिउ परिके। १८काराव ल्यो ताकिन धर्मसास्त्रल इताव सर्सिउ लिज्या, “दाइ भाःज्याव घेलाई ओयाःत महला भाःदचान्या माताए,” सोनो, “येन दाज्याव मिँए ब ओजेला दैन्या हक लिज्या।”

१९सुवाराए मन्दलीलाव लोम्बालाई ओपाहा भाःदचाव यापैकिन नेब्लो सोम्लोराए यापाँ ओमाखैवा पै थै ज़ ताथैच्यो। २०नोए ओगलती उथ०रिकिन प्राइँए डाक सिडारो ताके। हो ताकिन उपुर्कावर मनी माचाव येन दान्या छे-न्या लेर। २१डा नँलाई परमेस्वरए ओडाक, येसु खीसए ओडाक सोनो ओराखतैव चाकज्याराए याडाक

डाअरैनिज्या, जो मिँलाई तादी ब आव पाँ भरी मिँ रैःद तादोयो।

२२मन्दलीलाव लोम्बार नराजैक चावस माथ-रैद ताराजैयो। छीनी नोराए यागलती उपुलुस्किन नोरास नँ नपाहा ब बान्या ले। नितावनी नपाँःच्या तापुलुस्क। २३नँ फरी डादाकिनकाव मिताव री वाज़ ताओयो। नो कैताक कैताक हुज्याव नजोरो सोनो नफूलाव बेथाए जूनी तुपुरू तुपुरू दाखमदच ओयो।

२४रूवा रूवाराए यागलती ते छुतराए है यामारादोदी ब ओलनी ज़ छर्लङ्ग रैःज्या। रूवा रूवाराए यागलती फरी डादा मापुलुस्द छीनी वाज़ रैःज्या। २५हो मिताव ज़ रूवा रूवा मिँराए चाव यायेन ब डादा ज़ रैःज्या। कितर यायेन आछिम ओमोसिदी ब तछा जुनी ब चावनी ज़ रैःन्या ले।

### परमेस्वरए ओपाँत हुव बाँदार

६ परमेस्वरए ओपाँत हुव बाँदाराए फरी यासाहुराए याधूँल लिद यामान नैद ओराएरक। हो ताकिन ची छुतराए परमेस्वरए उमिन ब बले-व दैन्या मालेर, गोपाँए उगुस्ती ब दाधुन्या मालेर। २रूवा रूवा बाँदाराए यासाहुर यायुँ हुबोर यालिकिन,



‘परमेस्वरनी ते दाज्यु भाइ ज़ ची गिन्ल्यो, काराव ओमान नैदचान्या?’ है तालिरक। बुरू, ‘उयुँ हुबो गेयुँलाव मिँए ओयेन गेदोऽया’ लिद भन ज़ चावस सेवा ओदोरक।

### रूप्या पैसाए लोभ

है जैद नँ आव पाँर पैद यासम्जैयो। ३जोए गेप्रभु येसु ख्रीसए साचो ओपाँलाई माभैःद परमेस्वरस खैन्या येमकिन तँनी ओरापैकिन, ४नो मिँ काता ज़ ओमासैऽयावत ब स०द सघ्योःसिऽया। निताव मिँर तके पाँत ब खर्लेसिन्या इंसिन्या वाज़ खिम्ज्यार। ननी ज़ खिस्न्या, माखैन्या, थल्न्या सोनो साँन्या वाज़ ताऽया। ५नितावराए यारुँ बिप्यादा ताःसिउ ताद यारुँल परमेस्वरए साचो ओपाँ वैसिउ उलिऽयावए या याल ब माखैर। नोराए यादोऽयाव धर्मनी यालाई तान्या यातिर वाज़ दोऽयार। ६साचो ज़ परमेस्वरए ओपाँ दान्या ते सोन्तोकोस लिन्या ज़, नो ज़ गेलाई घेप्पा फाइदा लिऽया। ७गे आव मानुवात गेहुक काता ज़ रैद गेमाहुइ। गेबाक ब काता ज़ मालाँद बान्या गेले। ८गेलाई ज़्यान्या क्वाइसिन्या उलिकिन नाःत ज़ सोन्तोकोस ल्यो ताके। ९नो कोसै पैऽयावर ते पापल पारैऽयाव छे छे डम्सिउ भिबला मितावल परिऽयार।

नो कोसै यापैऽयावनी ज़ माचाहिउ बलेस्न्या येन दाद यानी ज़ नास तान्याल बाऽयार। १०रूप्या पैसादा युँ थू जैन्या ज़ माचाव भरिए ओजरा। रूवा रूवाराए यारुँ नदा ज़ भाःद परमेस्वरए ओपाँनी तँदा यातर्किउए यारुँलाई याज़ घोइऽयार।

### माचाहिउ पाँ वैन्यात सा भाःन्या

११खाली नँ परमेस्वरए उयुँलाव मिँ, आव पाँरानी अछतड लिनी। बुरू नँ सोजोनी दान्या, परमेस्वरस खैन्या, परमेस्वरलाई युँ हुप्या, मुइलिउ ताद नँ मेंए ल्योदा युँ थू जैद खैन्या, थ०रिद तहस लिन्यादा कलँ लिनी। १२परमेस्वरए ओपाँनी माचाव पाँलाई हारैद वैन्यात नर्सा भाःयो। सोनो परमेस्वरए खुल्द याद ओनैनिऽयाव अजम्बरी जुनीलाई तारास्यो। नँ डादा ज़ ‘हो येम ज़ डाबारिऽया’ लिद कुधुराए डाक नथाँसिके। १३डा नँलाई, प्राइँलाई यास० भाःदचाऽयाव परमेस्वर सोनो पन्तियस पिलातसए ओडाकाव साचो पाँलाई थ०रैदचाऽयाव येसु ख्रीसनी निमिननी डाअर्थैनिऽया, १४गेप्रभु येसु ख्रीस फरी ओमासैःसिवा पै नँ आव पाँ भरित नपाँःच्या मापलेःद बनै सतस दोयो। १५नोलाई ओल परमेस्वरए ओगोइँव बेलाक ज़ सरैःरिऽयाव।

नो सरैःज्याव गेपरमेस्वर बनै असिक ल्यो तोबोका तोबो नाम नमलावराए याडैताव, राजाराए याराजा, प्रभुराए याप्रभु, १६खर्क ज़ मासिज्याव, सु ज़ यामालिधुज्याव ज़गैल लिज्याव, सुए ब यामारैःधुज्याव परमेस्वर ज़। नोलाई बनै घेप्पा मान सोनो खर्क ज़ माखेमन्या राज काज ब ओताक। आमेल।

### धनीरालाई सम्जैन्या

१७नँ आव जुकलाव धनीरालाई ब है यादोयो — नोर स०द तासघ्योःसिरक, सोनो याआस खेमन्या धन सम्पतीत तानैरक। बुरू गेयुँर होलाँ जैदचान्याए जूनी प्राईं जोरैदचाज्याव परमेस्वरए ल्योदा यायुँ थू ओजैरक। १८नोर धन

कमैन्याए ओपोल चाव येनर दाद युँ गराँव ताद छुतलाई याधुन्यार ओतारक। १९इतावनी ज़ अजम्बरी जुनीए सामा यादोकिन साचो जुनीए थालन याभाःज्याव मिताव ज़ ताज्या।

### आव पाँलाई पाथस नैव ताके

२०अ तिमोथी, नँलाई परमेस्वरए नकुइत याद ओनैनिज्याव भरी पाथस नैयो। आव मानुवाताव अत्ताकलाव माचाहिउ पाँरानी सोनो सैन्या जैसिज्यावराए ‘आव ज़ ग्यान’ लिद याथःरैवनी अछतड लिनी। २१ख्वा ख्वार ते भन नो येम ज़ बाद परमेस्वरए ओपाँकिन तँदा ज़ बाद लेर। परमेस्वरए उयुँ जेल्योदा ओयाल्क।